

Qalam

Bilangan 79 *Jumādā al-Thānī* 1376 Februari 1957 60 sen

Dr Burhanuddin dengan “PAS”

Mengingat kepada kedudukan Persatuan Islam Semalaya semenjak ditubuhkan lima tahun dahulu hingga sekarang tidak mempunyai seorang pemimpin yang cekap dan tegas untuk memimpinya sehingga pada permulaannya dahulu “PAS” tidak dapat berdiri dengan sewajarnya sebagai sebuah badan siasah yang berparti disiplin/ maka dengan kesanggupan Dr Burhanuddin menjadi Yang Dipertua “PAS” kita yakin umat Islam di seluruh Tanah Melayu akan menyambut dengan gembira kesanggupan beliau itu.

Sungguhpun orang-orang cukup mengetahui bahawa Dr Burhanuddin dalam perjuangan-perjuangan yang telah lalu berjuang di dalam asas Parti Kebangsaan namun umat Islam mengetahui dengan cukup bahawa hati dan jiwanya itu ialah sebagai seorang Islam, seorang yang sentiasa menghidupkan roh dan jiwa umat melayu dengan jiwa keIslaman, maka dengan kerana itu kesanggupannya menjadi Yang Dipertua “PAS” bermakna sudahlah pada tempatnya.

Hanya sanya perlu mendapat perhatian dari beliau sendiri bahawa sekarang dengan kesanggupan yang telah diterimanya ia sudah dengan sendirinya hatinya atau tegasnya telah menerima seruan Tuhan untuk menegakkan cita-cita

Islam di Semenanjung Tanah Melayu ini. Untuk menegakkan cita-cita Islam itu kita berharap dan harus umat Melayu sekaliannya berharap supaya dalam memperjuangkan kalimah Tuhan itu hendaklah tegas-tegas terhadap lawan, tegas terhadap sesiapa pun dan menghidupkan berkasih sayang (*ruḥamā' baynahum*) di antara sekalian umat Islam di seluruh Tanah Melayu ini. Kita berharap kiranya Dr Burhanuddin tidak akan berjalan atau meniti dengan samar-samar dalam langkah perjuangannya memperjuangkan cita-cita Islam dan kita berharap di dalam dadanya berkeyakinan dengan seyakini-yakinnya bahawa yang sedikit itu tidak bererti akan kalah asal ada pertolongan Tuhan. Percayalah bahawa tuhan akan menolong orang yang akan menegakkan kalimahnyanya di dunia ini walaupun ia akan dikata dan dinista orang.

Dalam melaksanakan cita-cita “PAS” itu kita berharap hendaknya Dr Burhanuddin menganjurkan kepada ahli-ahli jawatankuasa supaya “PAS” mengadakan suatu program perjuangan yang konkrit yang tiap-tiap ahli jawatankuasa atau pemandu “PAS” itu tatkala mendatangkan sesuatu cadangan janganlah hendaknya cadangan-cadangan itu hanya cadangan belaka, tetapi biasakanlah apabila membuat sesuatu cadangan maka sertakan syor bagaimana cara melaksanakan cadangan-cadangan itu dan siapa pula yang mesti sanggup untuk menjalankannya. Banyak cadangan-cadangan yang bagus dan indah tidak dapat dilaksanakan dan hanya terbengkalai begitu sahaja dan segala cita tidak dapat berjalan sebagaimana yang berlaku pada masa-masa yang telah lalu.

Kerana kemahiran Dr Burhanuddin di dalam menghadapi suasana politik kelak maka seharusnya pula gunakanlah kebijaksanaan bagaimana menyusun barisan ke dalam supaya dari suatu ke suatu masa kekuatan “PAS” makin mendalam di masyarakat kita. Mudah-mudahan

Tuhan membukakan hati umat Islam, menginsafkan umat Islam bahawa tiap-tiap umat Islam hari ini sudah bertanggungjawab kepada Tuhan untuk menegakkan kalimah Tuhan di mana mereka berada dan mudah-mudahan keinsafan itu mendalam. Dengan memberi keinsafan umat secara ini maka kita percaya bahawa tidak berapa lama lagi di Semenanjung Tanah Melayu ini akan timbul mujahid-mujahid yang akan bekerja siang dan malam untuk menegakkan kalimah Tuhan! Marilah kita berdoa mudah-mudahan Tuhan memberi taufik dan hidayah kepada kita bersama supaya umat Islam insaf – Amin - Amin.

Semata-mata di Indonesia

Terbit daripada berita-berita yang tersiar kononnya untuk menghadapi sesuatu suasana di Indonesia sekarang maka Presiden Sukarno telah membentuk sebuah “Dewan Revolutioner” yang mentadbirkan suatu pemerintahan di Indonesia yang dimaklumi sebagai suatu pemerintahan diktator. Hal yang demikian ini adalah suatu hal yang memang telah dijangka harus akan dibuat oleh Presiden Sukarno yang ditujukan bukannya untuk melaksanakan suatu program kebaikan persatuan negara Indonesia tetapi terang dan nyata bahawa langkah-langkah yang dibuat itu tidak lain dan tidak bukan untuk menyampaikan segala cita-citanya yang disalurkan mengikut saluran yang ditajanya di dalam Parti Nasional Indonesia (P.N.I.) yang telah menjadi penggalang cita-cita pancasila yang dipegang dan dipertahankan oleh Presiden itu sendiri.

Dalam kejadian-kejadian yang telah berlaku pada masa-masa yang lampau terang dan jelas tatkala menegakkan pancasila itu ia mengemukakan bahawa pancasila itu sahajalah yang mesti dipertahankan dan kerana itu ia selalu mencabar umat Islam

yang menjadi tulang punggung pengabdian di Indonesia itu dalam cita-cita mereka untuk menegakkan negara Islam.

Pada masa kebangkitan dahulu, dalam masa melawan penjajahan, persatuan umat di Indonesia adalah kuat dan tiang perjuangan menghapuskan penjajahan Belanda itu di sana sini hidup semangat takbir, semangat perjuangan umat Islam. Tetapi apabila kemerdekaan telah tercapai maka sila yang lima itulah yang ditaja oleh Presiden dan bekas-bekas pejuang umat Islam banyak yang ketepi atau yang diketepikan oleh Parti Nasional dan dalam ketenteraan timbullah bekas-bekas tentera yang memihak Belanda dari satu ke satu masa kemuka atau dikemukakan untuk menduduki tempat-tempat tentera yang ada sekarang.

Bagaimana umat Islam? Ini menjadi tanda tanya dan banyak penderitaan-penderitaan yang dirasa mereka, kepahitan-kepahitan hidup yang diderita mereka oleh kerana seolah-olah habis manis sepah dibuang dihadapkan kepada mereka itu. Namun demikian mereka terus berjuang dan terus memperjuangkan kewajipan mereka bukan kepada Presiden Sukarno tetapi kepada Tuhan untuk menyampaikan kehendak Tuhan supaya berlaku hukum-hukum Tuhan di serata Negara Indonesia. Begitulah tekad dan tugas, begitulah khidmat umat Islam di Indonesia. Kartosuwiryo, imam *Dār al-Islām* di Jawa Barat yang dahulunya menjadi anggota “Parti Syarikat Islam Indonesia” tatkala telah dapat bersama-sama menghalau penjajah telah melihat riak yang dibawa oleh pimpinan Sukarno dan kawan-kawannya dan melihat bahawa gerak geri itu kalau dibiarkan sudah terang akan bertujuan menghapuskan cita-cita atau tanggungjawab umat Islam kepada Tuhannya dan kerana itulah maka ia menghilangkan diri dengan suatu keyakinan bahawa Negara Islam Indonesia tidak akan terdiri selagi Sukarno masih menjadi pemimpinnya dan kerana itulah